

ЎЗБЕКИСТОН РЕСПУБЛИКАСИ  
ВАЗИРЛАР МАҲКАМАСИНИНГ  
Қ А Р О Р И



ПОСТАНОВЛЕНИЕ  
КАБИНЕТА МИНИСТРОВ  
РЕСПУБЛИКИ УЗБЕКИСТАН

6 июнь 2018 й.г. № 425

Тошкент ш. – г. Ташкент

**Рангли ва қора металллар парчалари, чиқиндилари билан ишлаш тартибини такомиллаштириш чора-тадбирлари тўғрисида**

Рангли ва қора металллар парчалари, чиқиндилари билан ишлаш тартибини такомиллаштириш, республика иқтисодиёти соҳаларининг хўжалик фаолияти жараёнида ва аҳолининг ҳаёт фаолияти давомида ҳосил бўлувчи рангли ва қора металллар парчалари, чиқиндиларининг иккиламчи ресурсларидан кейинчалик юқори қўшимча қиймат билан маҳсулот ишлаб чиқариш учун чуқур қайта ишлаш жараёнига жалб қилиш йўли билан улардан оқилона фойдаланишни таъминлаш мақсадида Вазирлар Маҳкамаси қарор қилади:

1. Ўзбекистон Республикаси ҳудудида:

Ўзбекистон Республикаси Президентининг «Ўзметкомбинат» АЖ бошқаруви тизимини янада такомиллаштириш чора-тадбирлар тўғрисида» 2017 йил 15 сентябрдаги ПҚ-3277-сон қарорига мувофиқ – «Ўзметкомбинат» АЖ Ўзбекистон Республикаси ҳудудида қора металл парчалари ва чиқиндиларини тайёрлаш (харид қилиш) бўйича ягона ваколатли орган ҳисобланиши;

Ўзбекистон Республикаси Вазирлар Маҳкамасининг «Рангли металл парчалари ва чиқиндиларини тўплаш, топшириш ҳамда қайта ишлаш тизимини такомиллаштириш чора-тадбирлари тўғрисида» 2017 йил 18 октябрдаги 849-сон қарорига мувофиқ – рангли металл парчалари ва чиқиндиларини тайёрлашни фақат «Ўзиккиламчиранглиметалл» АЖ амалга ошириши;

Ўзбекистон Республикаси Президентининг «Рангли металллар парчалари ва чиқиндилари ўғирланиши ҳамда ноқонуний четга олиб чиқиб кетилишининг олдини олиш чора-тадбирлари тўғрисида» 2000 йил 4 мартдаги ПФ-2559-сон Фармониغا мувофиқ, Ўзбекистон Республикаси Президентининг «Ўзбекистон Республикаси Президентининг айрим қарорларига ўзгартишлар киритиш, шунингдек баъзиларини ўз кучини йўқотган деб ҳисоблаш тўғрисида» 2018 йил 12 январдаги ПФ-5300-сон Фармони билан киритилган ўзгаришларни ҳисобга олган ҳолда, «Ўзиккиламчиранглиметалл» АЖ ва унинг таркибий тузилмалари жисмоний шахслардан рангли металлларнинг маиший парчаларини, шу жумладан, фойдаланиш учун мўлжалланган асбоблар ва ускуналарни, шунингдек, Ҳукумат қарори билан тасдиқланган рўйхат бўйича рангли металллар парчалари ва чиқиндиларини махсус қабул пунктлари орқали қабул қилиши маълумот учун қабул қилинсин.

2. Қуйидагилар:

Рангли ва қора металл парчалари, чиқиндилари билан ишлаш тартиби тўғрисидаги низом 1-иловага мувофиқ;

Жисмоний шахслардан қабул қилишга рухсат этилган маиший мақсаддаги рангли металл парчалари ва чиқиндиларининг рўйхати 2-иловага мувофиқ тасдиқлансин.

3. «Ўзиккиламчиранглиметалл» АЖ икки ой муддатда Қорақалпоғистон Республикаси ва республика вилоятлари шаҳарлари ва туман марказларида ушбу қарорга 2-иловада кўрсатилган рангли металл парчалари ва чиқиндиларини жисмоний шахслардан қабул қилиш пунктларини ташкил қилсин.

4. Белгилансинки, 2019 йил 1 январдан бошлаб ташкилотларнинг, шахсий қуйиш ва металл прокати ишлаб чиқаришига эга бўлган ташкилотлардан ташқари (банкротлик ва тугатиш ҳолларидан ташқари), ташкилотларнинг ўз қуйиш ва металл прокати ишлаб чиқаришига эга бўлган ташкилотлар бундан мустасно (банкротлик ва тугатиш ҳолларидан ташқари), банкротлиги, тугатилиши, реконструкция ва модернизация қилиниши тартиботларини ўтказиш давомида белгиланган тартибда ҳисобдан чиқариладиган таркибида рангли ва қора металллар бўлган табиий ва маънавий эскирган асбоб-ускуналар «Ўзметкомбинат» АЖ ва «Ўзиккиламчиранглиметалл» АЖга эркин (шартномавий) нархда топширилиши керак.

5. Ўзбекистон Республикаси Ҳукуматининг 3-иловага мувофиқ айрим қарорлари ўз кучини йўқотган деб эътироф этилсин.

6. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари – «Ўзбекнефтгаз» АЖ бошқарув раиси А.С.Султанов, «Ўзметкомбинат» АЖ бошқаруви раиси А.Х.Хурсанов ва «Ўзиккиламчиранглиметалл» АЖ бош директори Ф.Р.Абдуллаев зиммасига юклансин.

Ўзбекистон Республикасининг  
Бош вазири



А.Арипов

Вазирлар Маҳкамасининг  
2018 йил 6 июндаги  
425-сон қарорига  
1-илова

**Рангли ва қора металллар парчалари,  
чиқиндилари билан ишлаш тартиби тўғрисида  
НИЗОМ**

**1-боб. Умумий қоидалар**

1. Ушбу Низом рангли ва қора металллар парчалари, чиқиндилари билан ишлаш тартибини, асосий тушунчаларни, тартиботлар ва талабларни, шунингдек, ушбу соҳадаги муносабатларни тартибга солиш хусусиятларини белгилайди ҳамда Ўзбекистон Республикаси ҳудудида барча давлат ва хўжалик бошқаруви органлари, маҳаллий ижро этувчи ҳокимият органлари, бошқа ташкилотлар ва жисмоний шахслар томонидан бажарилиши мажбурийдир.

2. Ушбу Низомда қуйидаги асосий тушунчалар қўлланилади:

**металл парчалари** – рангли ва қора металллар парчалари, чиқиндилари, таркибида рангли ёки қора металллар ва уларнинг қотишмалари мавжуд бўлган яроқсиз ҳолга келган ёки ўз истеъмол хусусиятларини йўқотган маҳсулотлар, товарлар, рангли ёки қора металллар ва уларнинг қотишмаларидан маҳсулот ишлаб чиқаришда ҳосил бўлган чиқиндилар, шунингдек, кўрсатилган маҳсулотларни ишлаб чиқариш жараёнида юзага келган тўғрилаб бўлмас яроқсиз маҳсулот;

**тайёрлаш** – металл парчаларини сотиб олиш, саралаш, қайта ишлаш;

**парчаларни топширувчилар** – тайёрловчига металл парчаларини топшираётган давлат ва хўжалик бошқаруви органлари, маҳаллий ижро этувчи ҳокимият органлари, ташкилий-ҳуқуқий шаклидан қатъи назар юридик шахслар, шунингдек, жисмоний шахслар;

**тайёрловчи** – «Ўзметкомбинат» АЖ ва «Ўзиккиламчиранглиметалл» АЖ.

3. Металл парчалари мулкдорлари – юридик ва жисмоний шахслар қонун ҳужжатларида белгиланган ваколатлар доирасида уларга эгаллик қиладилар, фойдаланадилар ва тасарруф этадилар.

4. Келгуси йил учун республика ичида металл парчаларини тайёрлаш кўрсаткичлари Ўзбекистон Республикаси Иқтисодиёт вазирлиги томонидан «Ўзметкомбинат» АЖ ва «Ўзиккиламчиранглиметалл» АЖ билан ҳамкорликда, давлат ва хўжалик бошқаруви органлари, маҳаллий ижро этувчи ҳокимият органларининг таклифларини инобатга олган ҳолда ишлаб чиқилади.

Келгуси йил учун таклифлар ҳар йили 1 октябргача бўлган муддатда берилиши таъминланади.

5. Рангли ва қора металлларнинг парчалари, чиқиндилари билан муомала қилиш ушбу Низомга иловага мувофиқ схема бўйича амалга оширилади.

6. Қора металлларнинг парчалари, чиқиндиларини тайёрлаш баланси ҳар йили белгиланган тартибда Ўзбекистон Республикаси Президентининг қарори билан тасдиқланади.

7. Рангли металлнинг парчалари ва чиқиндиларининг ҳосил бўлиши баланси ҳар йили белгиланган тартибда Ўзбекистон Республикаси Иқтисодиёт вазирлиги ҳайъати томонидан тасдиқланади.

### **2-боб. Парчаларни топширувчилар томонидан металл парчаларининг етказиб берилиши**

8. Парчаларни топширувчиларда ҳосил бўладиган металл парчалари эркин (шартномавий) нархларда ушбу Низомда белгиланган тартибда тайёрловчига топширилиши шарт.

Бунда ўзининг қуюв ва металл прокати ишлаб чиқаришлари бўлган ташкилотлар ўзларига тегишли металл парчаларини қайта ишлаш ҳуқуқига эга.

9. Парчаларни топширувчилар қуйидагиларни таъминлайдилар:

металл парчаларини йиғиш, сақлаш ва тайёрловчига етказиб бериш;

металл парчаларини ташиш, қайта ишлаш ва қайта қуйиш учун хавфсиз бўлган ҳолатда етказиб бериш.

Етказиб бериладиган металл парчалари ёнувчан-портловчан, кимёвий ва радиоактив материаллардан зарарсизлантирилган бўлиши лозим.

10. Тайёрловчига портловчан, кимёвий ифлосланган ва радиоактив металл парчаларини етказиб бериш тақиқланади.

11. Тайёрловчи металл парчалари мунтазам асосда ҳосил бўладиган парчаларни топширувчиларга бепул асосда, металл парчаларини йиғиш ва тайёрловчига етказиб берунга қадар сақлаш учун контейнерлар, урналар, қутилар ва бошқа воситаларни вақтинча фойдаланишга беришга ҳақли.

12. Металл парчаларининг миқдори (оғирлиги) ва тавсифи тайёрловчи томонидан металл парчаларини қабул қилиш ҳолати бўйича тузиладиган қабул қилиш-топшириш далолатномаларида қайд қилинади.

13. Металл парчаларининг ҳисоби тайёрловчининг раҳбари томонидан тайинланган шахс томонидан юритилади.

14. Тайёрловчининг махсус қабул қилиш шахобчалари радиация назоратини ўтказиш учун зарур ускуналар билан таъминланиши шарт.

Тайёрловчи металл парчалари ҳар бир туркумининг радиация назоратидан ва кимёвий ва портлаш жиҳатидан хавфсизлик бўйича кириш назоратидан ўтказилишини белгиланган тартибда таъминлашга мажбур.

Назорат тегишли тайёргарлик ва аттестациядан ўтган шахслар томонидан амалга оширилади.

15. Радиоактив, кимёвий ифлосланган ва портловчан металл парчалари аниқланган ҳолларда тайёрловчи зарур чораларни кўриш учун зудлик билан тегишли хизматларга белгиланган тартибда хабар беради.

### **3-боб. Юридик шахслардан металл парчаларини қабул қилиш**

16. Юридик шахслардан металл парчаларини қабул қилиш тузилган шартномаларга асосан тайёрловчининг махсус қабул қилиш шахобчаларида, ҳар бир туркум бўйича брутто оғирлиги ва транспорт воситаси, идиши ва ифлосланганлиги ўртасидаги фарқ сифатида аниқланадиган нетто оғирлиги бўйича амалга оширилади.

17. Тайёрловчи ва парчаларни топширувчи ўртасида тузиладиган шартномаларда металл парчаларини етказиб бериш ҳажмлари, турлари, муддатлари, тўлов шартлари, тарафларнинг ҳуқуқ ва мажбуриятлари, шунингдек, шартномада назарда тутилган мажбуриятларни бажармаганлик учун жавобгарлиги кўрсатилади.

Тайёрловчи юридик шахслар билан, уларга металл парчаларини йиғиш, сақлаш ва фақат тайёрловчига етказиб бериш ҳуқуқини берган ҳолда, металл парчаларини етказиб беришга шартномалар тузиш йўли билан металл парчаларини тайёрлашга ҳақли.

18. Парчаларнинг ҳар бир туркумига тайёрловчи томонидан белгиланган шаклда қабул қилиш-топшириш далолатномаси мажбурий тартибда тузилади. Далолатнома асосида парчаларни топширувчилар билан ўзаро ҳисоб-китоблар, шунингдек, олинган шартномавий мажбуриятларнинг бажарилиши мониторинги амалга оширилади.

Қабул қилиш-топшириш далолатномаси қатъий ҳисобот бериладиган ҳужжат бўлиб, ҳар бир шундай далолатнома муфассал рақамланади, ҳар бир варағи белгиланган тартибда рақамланган ва тикилган қабул қилиш-топшириш далолатномалари ҳисобга олиш дафтарида (кейинги ўринларда ҳисобга олиш дафтари деб аталади) қайд этилади.

19. Тайёрловчига транспорт воситасида етказиб бериладиган металл парчалари топшириш жойида миқдори ва сифати бўйича қабул қилинади, натижалари бўйича қабул қилиш-топшириш далолатномаси расмийлаштирилади. Металл парчаларини қабул қилиш-топшириш далолатномаси уч нусхада тузилади, уларнинг икkitаси тайёрловчида қолади, учинчиси эса парчаларни топширувчига берилади.

20. Металл парчалари темир йўл транспортида етказиб берилганда ҳар бир темир йўл вагонига (контейнерга), вагон (контейнер) келган кунни ҳисобга олмаган ҳолда вагон (контейнер) тайёрловчига келган пайтдан бошлаб икки суткадан кўп бўлмаган муддатда уч нусхада қабул қилиш-топшириш далолатномаси тузилади.

21. Башарти тайёрловчида тушган металл парчаларининг сифати бўйича эътирозлар юзага келса, у ушбу металл парчаларини жавобгарлик остида сақлашга қабул қилади ва металл парчаларини қабул қилиш бўйича келишилган қарорни қабул қилиш учун парчаларни топширувчини ёки унинг вакилини чақиради.

#### **4-боб. Жисмоний шахслардан металл парчаларини қабул қилиш**

22. Тайёрловчининг аҳолидан металл парчалари қабул қилинадиган махсус шахобчаларида ҳаммага кўринадиган жойда қуйидаги ахборот кўрсатилган эълон осилган бўлиши лозим:

металл парчаларини қабул қилиш шартлари ва нархлари;  
жисмоний шахслардан қабул қилиниши руҳсат этилган металл парчалари турлари рўйхати.

23. Металл парчалари уларнинг ҳар бир туркумига тайёрловчи томонидан белгиланган шаклда қабул қилиш-топшириш далолатномаси мажбурий тартибда тузилган ҳолда қабул қилинади.

24. Қабул қилиш-топшириш далолатномаси икки нусхада тузилади (биттаси металл парчаларини топшираётган шахсга берилади, иккинчиси тайёрловчида қолади).

25. Жисмоний шахслар билан ўзаро ҳисоб-китоблар қабул қилиш-топшириш далолатномаси асосида амалга оширилади.

26. Ҳар мартаба металл парчалари қабул қилинганда ҳисобга олиш дафтарига қуйидаги маълумотлар киритилади:

- а) қабул қилиш-топшириш далолатномасининг рўйхат рақами;
- б) металл парчаларини қабул қилиш санаси;
- в) парча ва чиқиндиларни топшираётган шахс ҳақидаги маълумотлар;
- г) қабул қилинган металл парчаларининг ГОСТга мувофиқ тури, русусми ва қисқача тавсифи;
- д) металл парчаларининг портлаш хавфсизлиги ва радиация назоратлари маълумотлари, назоратни амалга оширган шахсларнинг имзоси остида;
- е) қабул қилинган металл парчаларининг ифлосланганлиги фоизи;
- ж) қабул қилинган металл парчаларининг оғирлиги ва қиймати;
- з) дафтарга ёзув киритган шахс ҳақидаги маълумотлар ва имзоси.

27. Ҳисобга олиш дафтари ва қабул қилиш-топшириш далолатномалари металл парчаларининг қабул қилинганлиги тўғрисида охириги ёзув киритилган санадан бошлаб камида 5 йил мобайнида сақланади.

28. Қабул қилиш-топшириш далолатномаларининг ўз вақтида ва тўғри тузилиши, ҳисобга олиш дафтарига киритилганлиги, улардаги маълумотларнинг аниқлиги ва ҳаққонийлиги учун тайёрловчининг металл парчаларини қабул қилиш учун масъул бўлган ваколатли шахси жавоб беради.

29. Жисмоний шахслардан рангли ва қора металлларнинг электр техникаси (кучланиш кабеллари, электр узатиш ва алоқа тармоқларининг ҳаво линиялари), саноат (қиринди, шлак, катализаторлар), ҳарбий аҳамиятга эга бўлган парча ва чиқиндиларини, шунингдек, темир йўл, ҳаракатдаги таркиблар ва авиация транспорти қисмларини сотиб олиш тақиқланади.

30. 16 ёшга тўлмаган шахслардан металл парчаларини қабул қилишга йўл қўйилмайди. 14 ёшдан 16 ёшгача жисмоний шахслардан металл парчаларини қабул қилишга уларнинг қонуний вакилларининг уларнинг паспортига оид маълумотлар ва яшаш манзиллари кўрсатилган ёзма розилиги мавжуд бўлганда йўл қўйилади.

#### **5-боб. Металл парчалари учун ҳисоб-китоб қилиш**

31. Қабул қилинган металл парчалари учун тўлов пул маблағлари билан бозор асосида аниқланадиган эркин (шартномавий) нархлар бўйича, юридик шахслар учун – нақдсиз шаклда, жисмоний шахслар учун – нақд шаклда, шунингдек Ўзбекистон Республикасининг қонун ҳужжатларига мувофиқ тўловнинг бошқа усулларида амалга оширилади.

32. «Ўзметкомбинат» АЖ ва «Ўзиккиламчиранглиметалл» АЖ металл парчалари мунтазам асосда ҳосил бўладиган парчаларни топширувчиларга металл парчаларини топширишга фьючерс шартномалар бўйича олдиндан тўлов йўли билан белгиланган тартибда пул ўтказишга ҳақли.

### **6-боб. Тайёрловчи ва парчаларни топширувчининг жавобгарлиги**

33. Ушбу Низом талабларини бузганлик, шу жумладан, металл парчаларини йўқ қилганлик ва бузганлик, ахлатхонага ва парчаларни топширувчига бириктирилмаган ҳудудга ташлаганлик, ноқонуний сотганлик учун парчаларни топширувчилар қонун ҳужжатларида белгиланган тартибда жавобгарликка тортиладилар.

34. Санкцияларнинг қўлланилиши металл парчаларини топширишдан озод этмайди.

35. Металл парчаларининг келиб чиқиши учун парчаларни топширувчи жавоб беради.

### **7-боб. Парчаларнинг ҳосил бўлиши мониторингини ташкил қилиш**

36. Металл парчаларини тайёрлаш кўрсаткичларининг бажарилишини назорат қилиш Ўзбекистон Республикаси Вазирлар Маҳкамасининг Геология, ёқилғи-энергетика комплекси, кимё, нефть-кимё ва металлургия саноати масалалари комплекси томонидан амалга оширилади.

37. Давлат ва хўжалик бошқаруви органлари, маҳаллий ижро этувчи ҳокимият органлари ва бошқа ташкилотлар металл парчаларининг ҳосил бўлиши ва ишлатилиши прогнозини белгилайдилар ва ҳар чоракда тегишли маълумотларни Ўзбекистон Республикаси Давлат статистика кўмитасига тақдим этадилар.

Ўзбекистон Республикаси Давлат статистика кўмитаси олинган маълумотлар асосида ҳар чоракда ресурслар базасини таҳлил қилади ва металл парчалари айланиши оралик мониторингини амалга оширади, сўнгра таҳлилий маълумотларни республика ичида металл парчаларини тайёрлаш параметрларини шакллантиришда фойдаланиш учун Ўзбекистон Республикаси Иқтисодиёт вазирлигига тақдим этади.

38. «Ўзметкомбинат»АЖ ва «Ўзиккиламчиранглиметалл» АЖ жойлардаги махсус қабул қилиш шахобчалари фаолиятини назорат қилади.

39. Рангли ва қора металл парчалари, чиқиндилари билан ишлаш соҳасида фаолиятни назорат қилиш қонун ҳужжатларида белгиланган тартибда:

идоравий мансуб хўжалик субъектлари юзасидан – давлат ва хўжалик бошқаруви органлари томонидан;

ҳудудий бўйсунушдаги хўжалик субъектлари юзасидан – маҳаллий ижро этувчи ҳокимият органлари томонидан амалга оширилади.


40. Ушбу Низом талабларини бузишда айбдор бўлган шахслар қонун ҳужжатларига мувофиқ жавоб берадилар.

Рангли ва қора металл парчалари,  
чиқиндилари билан ишлаш тартиби  
тўғрисидаги низомга  
илова

Рангли ва қора металл парчалари, чиқиндилари билан ишлаш  
СХЕМАСИ

Босқич-лар	Тадбирлар	Субъектлар	Бажариш муддатлари
1-босқич	Республикада металл парчаларини тайёрлаш параметрларини шакллантириш	Иқтисодиёт вазирлиги, Давлат статистика қўмитаси, «Ўзметкомбинат» АЖ, «Ўзиккиламчиранглиметалл» АЖ	Ҳар йили, 1 октябргача
2-босқич	Рангли ва қора металлнинг парчалари, чиқиндиларини тайёрлаш балансларини ишлаб чиқиш	Иқтисодиёт вазирлиги, «Ўзметкомбинат» АЖ, «Ўзиккиламчиранглиметалл» АЖ	белгиланган муддатларда
3-босқич	1. Қора металл парчалари, чиқиндиларини тайёрлаш балансини келишиш ва тасдиқлаш 2. Рангли металл парчалари, чиқиндилари ҳосил бўлиши балансини тасдиқлаш	1. Вазирлар Маҳкамаси (Ўзбекистон Республикаси Президентининг тегишли қарорини қабул қилиш). 2. Иқтисодиёт вазирлиги (хайъат қарори)	белгиланган муддатларда
4-босқич	Метал парчаларини эркин (шартномавий) нархларда топшириш бўйича шартномалар тузиш	«Ўзметкомбинат» АЖ, «Ўзиккиламчиранглиметалл» АЖ, давлат ва хўжалик бошқаруви органлари, маҳаллий ижро этувчи ҳокимият органлари	йил мобайнида
5-босқич	Ўз металл парчаларини ишлатиш (қайта ишлаш)	Ўз қуйиш ва металл прокати ишлаб чиқаришларига эга бўлган ташкилотлар	йил мобайнида
6-босқич	Металл парчаларини қабул қилиш	Ихтисослаштирилган қабул қилиш шахобчалари ва участкалари	йил мобайнида
7-босқич	Металл парчалари учун ҳисоб-китоб қилиш	«Ўзметкомбинат» АЖ, «Ўзиккиламчиранглиметалл» АЖ	тузилган шартнома шартлари бўйича





Вазирлар Маҳкамасининг  
2018 йил 6 июндаги  
425-сон қарорига  
2-илова

**Жисмоний шахслардан қабул қилишга рухсат этилган маиший  
мақсаддаги рангли металллар парчалари ва  
РЎЙХАТИ**

1. Автотранспорт аккумуляторлари ва автотранспорт техникасига эҳтиёт қисмлар
2. Алюминий бидон, фляга, канистрлар
3. Алюминий қайиқлар
4. Алюминий дераза ва эшиклар
5. Чанғилар учун алюминий таёқлар ва қайишлар
6. Алюминий спиннинг ва ғалтаклар (катушки)
7. Антенналар
8. Барелефлар
9. Батарейкалар
10. Ички ёнув двигателларнинг блоклари ва дизелли двигателлар
11. Бра
12. Соқол олиш асбоблари
13. Маиший электр вентиляторлар
14. Вазалар
15. Ванналар
16. Илгаклар
17. Автомобиль ва трактор генераторлари, стартёрлари
18. Тарози тошлари
19. Газ горелкалари
20. Готовалнялар

21. Умумий фойдаланиш маиший асбобларининг деталлари
22. Газ колонкаларининг деталлари
23. Автомобиль, мотоцикл, мотороллер ва велосипедларнинг деталлари ва аксессуарлари
24. Чангютгичларнинг деталлари
25. Радиоаппаратура, телевизор, магнитофонларнинг деталлари
26. Совутгичларнинг деталлари
27. Болалар ўйинчоқлари
28. Човлилар (дуршлаг)
29. Аквалангистларнинг нафас олиш аксессуарлари
30. Ёндиргичлар
31. Кулфлар
32. Қозонлар
33. Чилчиноқлар (канделябр)
34. Карнизлар
35. Кастрюллар
36. Керагаз
37. Калитлар
38. Сув иситиш колонкалари
39. Беркитиш ва қадоқлаш учун қалпоқчалар, тубиклар, зарқоғоз (фолга)
40. Узуклар
41. Мебель халқалари
42. Тарозиларнинг шайини (коромисло)
43. Овқат пиширадиган қозонлар
44. Кофейниклар (қаҳва соладиган идиш)
45. Жўмраклар (кран, вентил), аралаштиргичлар (смесители)

46. Каравот, стол ва стуллар
47. Кружка, кўза, кумғонлар
48. Томлар
49. Ошхона ва овқатланиш анжомлари ва мебелли, мебель фурнитураси
50. Лампалар (чироқлар)
51. Жездан ясалган блесналар
52. Чизгичлар
53. Қайиқ моторлари
54. Қандиллар
55. Маникюр аксессуарлари
56. Мебель безаклари
57. Қахва тегирмони
58. Металл галантерея
59. Болалар ва ногиронлар аравачаларининг металл қисмлари
60. Товоқлар
61. Муסיқа асбоблари ва чолғулари
62. Гўшт қиймалагичлар
63. Кавшарлагичлар (паялник)
64. Кавшарлаш лампалари (чироқлари)
65. Кулдонлар
66. Маиший печлар
67. Патнислар
68. Шамдонлар
69. Стакандонлар (подстаканник)
70. Автомобиль ва трактор поршенлари
71. Эшик, дераза ва печ анжомлари

72. Примуслар
73. Алуминийдан тайёрланган эшик, дераза ромлари, шунингдек, уларнинг чиқиндилари
74. Қўлювгичлар
75. Самоварлар
76. Сантехника анжомлари
77. Газлантирилган сув учун сифонлар
78. Ҳайкалчалар
79. Шарикли ручка ва қаламларнинг стержен ва учлари
80. Ҳовончалар
81. Тоғоралар
82. Фонуслар (фонарлар)
83. Нон қолиплари
84. Электр ва маиший техника

Вазирлар Маҳкамасининг  
2018 йил 6 июндаги  
425-сон қарорига  
3-илова

**Ўзбекистон Республикаси Ҳукуматининг ўз кучини  
йўқотган деб эътироф этилаётган қарорлари  
РЎЙХАТИ**

1. Ўзбекистон Республикаси Вазирлар Маҳкамасининг «Қора ва рангли металллар парчалари ва чиқиндиларини таёрлаш, сақлаш, эҳтиётлаш ва топшириш тартиби тўғрисида» 1999 йил 5 февралдаги 49-сон қарори (Ўзбекистон Республикаси ҚТ, 1999 й., 2-сон, 8-модда).

2. Ўзбекистон Республикаси Вазирлар Маҳкамасининг «Ҳукумат комиссияларини тузиш масалалари бўйича Ўзбекистон Республикаси Вазирлар Маҳкамасининг айрим қарорларига ўзгаришлар, қўшимчалар киритиш ва ўз кучини йўқотган деб топиш тўғрисида» 2000 йил 19 сентябрдаги 359-сон қарорига 1-илованинг 19-банди.

3. Ўзбекистон Республикаси Вазирлар Маҳкамасининг «Ўзбекистон Республикаси Ҳукуматининг айрим қарорларига ўзгартиришлар киритиш тўғрисида (Ўзбекистон Республикаси Президентининг «Рангли металл парчалари, чиқиндиларини йиғиш, тайёрлаш ва қайта ишлаш тизимини такомиллаштириш тўғрисида» 2006 йил 18 июлдаги ПҚ-419 сон қарори)» 2006 йил 15 сентябрдаги 197-сон қарорига илованинг 1-банди (Ўзбекистон Республикаси ҚТ, 2006 й., 37-38-сон, 379-модда).